



Arkivnr: 2017/2448-2

Saksbehandlar: Ronny Skaar

### Saksframlegg

#### Saksgang

Utval	Saknr.	Møtedato
Utval for kultur, idrett og regional utvikling		19.03.2019
Fylkesutvalet		28.03.2019

### **Moster 2024. Markering av innføringa av kristenretten i Norge. Handsaming av rapport frå forprosjekt.**

#### **Samandrag**

Bømlo kommune og Hordaland fylkeskommune vedtok våren 2017 å gjennomføre eit forprosjekt for å greie ut grunnlaget for eit mogleg riksjubileum med sentral markering på Moster i 2024. Jubileet er knytt til at det då vil vere 1000 år sidan kristenretten vart vedteke på Mostertinget.

I tråd med det politiske vedtaket vart det utforma eit mandat for forprosjektet i tett dialog mellom administrasjonen i Hordaland fylkeskommune og Bømlo kommune. I denne prosessen var det også dialog med styret i Moster Amfi- og Kyrkjehistoriske Senter AS for å sikre innspel frå desse.

Styringsgruppa for forprosjektet har vore rådmann og kommunalsjef frå Bømlo kommune, og seksjonsleiar/utviklingssjef og fylkesdirektør for kultur og idrett i Hordaland fylkeskommune. For å sikre prosjektleiar eit forum for drøfting og innspel underveis i arbeidet vart det etablert ei arbeidsgruppe bestående av representantar frå Bømlo Teater, Moster Amfi- og Kyrkjehistoriske senter AS, Hordaland Fylkeskommune og Bømlo kommune.

Etter at forprosjektet no er gjennomført, er det styringsgruppa sin konklusjon at grunnlaget for eit nasjonalt jubileum for Kristenretten på Moster i 2024 er til stades. Styringsgruppa i forprosjektet meiner at det mest tenlege vil vere å opprette eit eige ideelt AS, eigd av Hordaland fylkeskommune og Bømlo kommune, og at dette selskapet får ansvaret for gjennomføring av hovudprosjektet, inklusiv sjølve jubileumsåret. Selskapet skal avviklast etter at alle arrangement er gjennomført og rapportar levert.

Forprosjektet tilrar å dele kostnadane opp i basis- og tiltakskostnadene. Basiskostnadene vil seie prosjektleiing, planlegging og administrasjon, men gradvis opptrapping av aktiviteten. Samla basiskostnadene for perioden 2019-2024 er estimert til omlag kr. 9.000.000,-

Tiltakskostnadene, estimert til 11.000.000,- for same periode, er knytt til innhald; markeringar, arrangement, jubileumsfest, bøker, læremiddel.

Forprosjektet legg opp til ei kostnadsdeling slik:

Bømlo kommune	5 mill.
Hordaland fylkeskommune	5 mill.
Nasjonale budsjett	10 mill.

Fylkesrådmannen føreslår å gje eit eingongstilskot på kr 3.150.000 frå avsette fondsmidlar, og vil koma attende til spørsmålet om ytterlegare tilskot.

## Forslag til innstilling

1. Fylkesutvalet sluttar seg til satsinga på riksjubileum i 2024 knytt til 1000-års markering av innføring av Kristenretten, med hovudbase for feiringa på Moster, slik det er skissert i saka.
2. Fylkesutvalet løyver kr 3.150.000 frå fondsmidlar frå Fartein Valen senteret til riksjubileum 2024 ved Bømlo kommune.
3. Fylkesrådmannen kjem attende til spørsmålet om ytterlegare fylkeskommunal finansiering i samband med budsjett for 2020 - 2014.

Ingrid Kristine Holm Svendsen  
kst. fylkesrådmann

Per Morten Ekerhovd  
fylkesdirektør kultur og idrett

*Saksframlegget er godkjent elektronisk og har derfor ingen underskrift.*

## Vedlegg

- 1 Rapport frå forprosjekt Moster 2025 Markering av innføringa av kristenretten i Norge

## Fylkesrådmannen, 06.03.2019

### Bakgrunn for saka:

Bømlo kommune og Hordaland fylkeskommune vedtok våren 2017 å gjennomføre eit forprosjekt for å greie ut grunnlaget for eit mogleg riksjuibuleum med sentral markering på Moster i 2024. Jubileet er knytt til at det då vil vere 1000 år sidan kristenretten vart vedteke på Mostertinget.

Hordaland fylkesting fatta følgjande vedtak 13.06.17:

1. Hordaland fylkeskommune vil støtte opp under arbeidet for eit riksjuibuleum i 2024 knytt til 1000-års markering av innføring av Kristenretten, med hovudbase for feiringa på Moster.
2. Det skal etablerast eit forprosjekt som i perioden fram til sommar 2018 skal ta stilling til m.a. organisering, selskapsform, satsingsområde, finansieringshøve, partnarskap og framdriftsplan for eit riksjuibuleum. Eit nærmere mandat for forprosjektet vert utarbeidd i samarbeid mellom kommune og fylkeskommune.
3. Bømlo kommune skal koordinere arbeidet med jubileet fram til ei evt anna organisering vert avgjort. Bømlo kommune og Hordaland fylkeskommune skal vere to av medlemmene i forprosjektgruppa.
4. Fylkesrådmannen kjem tilbake til framtidig finansiering av prosjektet i budsjettsamanheng.

Kommunestyret i Bømlo gjorde slikt vedtak 14.02.17:

1. Kommunestyret vedtek at det skal arbeidast for eit riksjuibuleum i 2024 knytt til 1000-års markering av innføring av Kristenretten.
2. Jubileet bør ha sentral markering på Moster.
3. Det skal etablerast eit forprosjekt i samarbeid med Hordaland fylkeskommune som fram til sommaren 2018 skal ta stilling til m.a. organisering, selskapsform, satsingsområde, finansieringsmuligheter, partnarskap og framdriftsplan for eit riksjuibuleum. Eit nærmere mandat for forprosjektet vert utarbeidd administrativt i samarbeid mellom kommune og fylkeskommune.
4. Forprosjektet må sikre samarbeid med sentrale aktørar som t.d. Moster Amfi- og Kyrkjehistoriske Senter AS og Bømlo Teater.
5. Ein oppstart av forprosjektet vert i 2017 finansiert innanfor vedtekne budsjetttramme. Rådmannen kjem til å gjere framlegg om eiga finansiering av forprosjektet i 2018.
6. Framtidig finansiering av eit hovudprosjekt vert å koma tilbake til i årlege budsjett og velferdsplanar.
7. Vedtaket i Bømlo kommunestyre forutsetter eit likelydande vedtak i fylkestinget.
8. Rådmannen vert beden om å rapportere til kommunestyret om framdrifta i forprosjektperioden.

I tråd med det politiske vedtaket vart det utforma eit mandat for forprosjektet i tett dialog mellom administrasjonen i Hordaland fylkeskommune og Bømlo kommune. I denne prosessen var det også dialog med styret i Moster Amfi- og Kyrkjehistoriske Senter AS for å sikre innspel frå desse.

Styringsgruppa for forprosjektet har vore rådmann og kommunalsjef frå Bømlo kommune, og seksjonsleiar/utviklingssjef og fylkesdirektør for kultur og idrett i Hordaland fylkeskommune. For å sikre prosjektleiar eit forum for drøfting og innspel underveis i arbeidet vart det etablert ei arbeidsgruppe bestående av representantar frå Bømlo Teater, Moster Amfi- og Kyrkjehistoriske senter AS, Hordaland Fylkeskommune og Bømlo kommune.

Etter ekstern utlysing vart Brynjar Stautland tilsett som prosjektleiar for forprosjektet i perioden 01.04.18 – 01.07.18. Han har forfatta rapporten i dialog med arbeids- og styringsgruppe.

### Vurderingar:

Etter at forprosjektet no er gjennomført, er det styringsgruppa sin konklusjon at grunnlaget for eit nasjonalt jubileum for Kristenretten på Moster i 2024 er til stades.

Jubileet sin legitimitet har det vore arbeidd med over lengre tid, mellom anna gjennom innhenting av profesjonsutsegn frå fagpersonar innan mellomalder-, retts- og religionshistorie. Forprosjektet bidreg til å synleggjere både historisk relevans og moglegheiter for korleis desse hendingane kan aktualiserast i dagens samfunn. I arbeidet har ein opplevd stor og positiv interesse for vårt val av fokus; «Verdiar i lovverk og samfunn».

Det området som har kravd størst merksemd i forprosjektet har vore organisering, og då spesielt kva selskapsform som vil vere tenleg i høve gjennomføringa av eit så stort og komplekst jubileum.

Som det går fram av rapporten har ein undersøkt og vurdert ulike selskapsformer og korleis desse har vore nytta i andre jubileum og markeringar. Det har vore brei semje om at eit AS er den mest tenlege selskapsforma.

Styret i Moster Amfi og Kyrkjehistoriske senter AS (MA) gav tidleg i prosessen signal om at ein ønskte å legge ansvaret for gjennomføringa av jubileet til det eksisterande selskapet. Argumentasjonen var m.a. at dette vil styrke Moster Amfi si rolle som forvaltar av den nasjonalhistoriske arven på Moster. Ein ønskte vidare at Moster Amfi skulle vere ansvarleg for jubileet i planleggingsfasen av hovudprosjektet fram til 2023, for deretter å opprette eit eige AS som stod ansvarleg i gjennomføringsdelen det siste året.

Moster Amfi og Kyrkjehistoriske senter AS er som kjend eigd 50% av Hordaland Fylkeskommune og 50% av Bømlo kommune. Både rådmannen i Bømlo og fylkesrådmannen har vore tydeleg på at ovannemnte løysing ikkje er tilrådeleg.

A endre selskapsform/organisering ved å opprette eit nytt AS rett før gjennomføringsperioden i 2024 er svært unaturleg, og vil krevje omfattande prosessar i høve kunnskapsoverføring, personellressursar, dialog med samarbeidspartnarar, relasjonsbygging, m.m.. Styringsgruppa vurderer dette som uaktuelt.

Med ei estimert økonomisk ramme på 20 mill. for hovudprosjektperioden er den økonomiske risikoen svært stor. Det er eit uttalt mål frå begge eigarane at ein ønskjer å styrke Moster Amfi som arena og som formidlar av ein unik arv, og at aktiviteten skal vere høgare etter jubileet enn han er no. Eit evt. negativt resultat i hovudprosjektet vil kunne øydeleggje for dette.

Styret i MA har også signalisert at dei har planar for utvikling av anlegget, slik at ein til jubileet har eit enno betre grunnlag for formidling og opplevelingar. Ei ny utstilling om tematikken i 1000-års jubileet har vore nemnt. Det vil vere svært positivt for anlegget i Moster amfi om jubileet i 2024 sette tydelege fysiske spor og at dette auka både aktivitet og attraktivitet. Det er likevel slik at ei utviding av anlegget vil vere utfordrande både med tanke på økonomi og kapasitet, og det er lite truleg at ein vil kunne handtere eit stort nasjonalt jubileumsarrangement i tillegg.

Styringsgruppa i forprosjektet meiner dette samla talar for at det mest tenlege vil vere å opprette eit eige AS, eigd av Hordaland fylkeskommune og Bømlo kommune, og at dette selskapet får ansvaret for gjennomføring av hovudprosjektet, inklusiv sjølve jubileumsåret. Selskapet skal avviklast etter at alle arrangement er gjennomført og rapportar levert.

Dersom tilrådinga her vert vedteke vil fylkeskommunen og kommunen sitje som eigarar i både eksisterande Moster Amfi og Kyrkjehistoriske senter AS og det nye aksjeselskapet. Styringsgruppa legg til grunn at spørsmålet om eventuelle investeringar i Moster Amfi vert vurdert på sjølvstendig grunnlag.

Forprosjektet sin klare anbefaling er at ein må sikre god kompetanse frå kultur og næringsliv i styret i det nye selskapet – i tillegg til representasjon frå eigarane. Bømlo Teater og Moster amfi bør også vere representert.

Når det gjeld partnarskap har forprosjektet peika på ei rekke aktørar som det vil vere naturleg å invitere til samarbeid med. Partnarskap innan politikk, akademia, samfunnsliv og kulturliv vil kunne bidra til å forankre og legitimere jubileet og skape moglegheiter for utvikling av innhald. Forprosjektet peikar på «Noreg i 1000 år» som eit initiativ det er særleg viktig å halde god dialog med i den vidare utviklinga av hovudprosjektet, då dette er tenkt som ein nasjonal overbygning over fleire 1000-års markeringar knytt til Olav den Heilage sitt liv». Vidare vil ei tydeleg og sterk regional forankring vere avgjerande. Ein legg til grunn at bispedømmet, universitets- og høgskolesektoren (UiB, HVL) og at viktige kulturaktørar i Bergen (BFO, Carte Blanche, Bergen Nasjonale opera mv ) er medspelarar og bidragsytarar. I tråd med prosjektet sitt føremål vil utstrekkt samarbeid med både Gulatinget og landslovjubileet vere sjølv sagt.

Det er viktig premiss i rapporten at barn og unge må prioriterast. Ein har forsøkt å peike på nokre moglegheiter for korleis dette kan syne att når ein skal utvikle innhald knytt til «verdiar i lovverk og samfunn». Arbeidet her må gå over fleire år og startar no. Det vil vere viktig å både ta i bruk eksisterande arenaer som grunnskule, kulturskule, den kulturelle skulesekken, folkebiblioteket, m.fl., samstundes som nye møteplassar og partnarskap vert skapt. Rapporten skisserer forslag til moglege tiltak på lokalt, regionalt og nasjonalt nivå.

**Økonomiske konsekvensar:**

Forprosjektet tilrår å dele kostnadane opp i basis- og tiltakskostnadene. Basiskostnadene vil seie prosjektleiing, planlegging og administrasjon, men gradvis opptrapping av aktiviteten. Samla basiskostnadene for perioden 2019-2024 er estimert til omlag kr. 9.000.000,-

Tiltakskostnadene, estimert til 11.000.000,- for same periode, er knytt til innhald; markeringar, arrangement, jubileumsfest, bøker, lærermiddel.

Ei evt. utbygging av anlegget/ei utstilling i Moster amfi er ikkje teke med som del av dette tiltaksbudsjettet.

Forprosjektet legg opp til ei kostnadsdeling slik:

Bømlo kommune	5 mill.
Hordaland fylkeskommune	5 mill.
Nasjonale budsjett	10 mill.

Gode partnarskap og samarbeid vil auke moglegheitene for ekstern finansiering av ulike tiltak.

Fylkesrådmannen føreslår at Hordaland fylkeskommune nyttar fondsmidlar som er avsett frå Fartein Valen prosjektet, som er avvikla. Opphaveleg vart det løyvd kr 6 millionar til dette tiltaket i Sveio. Kommunestyret i Sveio har vedteke å ikkje realisera prosjektet.

Dei avsette fondsmidlane på kr 6 millionar er etter vedtak i fylkesutvalet tidlegare nytta slik:

Skisseprosjekt Sentralbadet scenekunsthus	2.250.000
Skisseprosjekt Griegkartalet	500.000
Forprosjekt 1000-års markeringa	100.000
<b>Til saman</b>	<b>2.850.000</b>

Fylkesrådmannen rår til at restsummen på kr 3.150.000 vert løyvd til 1000 - års markeringa, ved Bømlo kommune.

Fylkesrådmannen vil koma attende til ytterlegare løyving i samband med budsjettet i åra 2020 – 2024.